



ULLOQ aprilip 9-aat 2024

UPA2024/24

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat

(Siunnersuuteqartoq: Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siumuminngaanniit ilinniartitaanerup aaqqissuussaanera, ilinniarfeqarfiit aaqqissuussaanerat minnerunngitsumillu ilinniagaqassutsip Nunatsinni qaffassartuarnissaa anguniagaraarput.

Qujavugullu Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisup inatsisissatut saqqummiusnaanut.

Ilinniagaqarneq ataqatigiissoq, suliffeqarfiit eqqummaarissut, ilinniartussanik piumasut, ammasut, tikilluaqqusisut, pikkorissartitsinerit pereeraangata ilinniagaqarnerlu naammassigaangat ilinniartuutikortik atorfinitsittaraat, ila assiliaq orniginassusia. Sulisitsisut innuttaasunik ikorfartuisut inerisaaqataasullu. Tassa taamani Naalakkersuisut, Inatsisartut, ilinniarfeqarfiit sulisitsisullu ornikkumasimasaraluaat.

Tamakku siunertaralugit Naalakkersuisut sulinerat ingerlasoq Naalakkersuisut saqqummiussineranni paasinarpoq. Siunertarineqartoq - inuusuttut siunissaminnut neriuteqarlutik ilinniarfiisa - naammassinnissinnaassuseqarnerullutik ingerlassasut aamma naalakkersuinikkut ingerlatsinikkullu assigiaartumik aamma naleqqussarsinnaalluarnerusumik siunissami ingerlanneqarnissaat kissaatigineqartoq. Siunertaq tamanna Siumumiit tapersorsorparput.

Inatsisiliornermut sulinermi illuatungeriit - imaappoq aaqqissuussineq massakut atuuttoq tunngavigalugu ingerlatsiinnarusuttut aamma Naalakkersuisut nutaamik aaqqissuussiniarlutik suliniuteqartut – akornanni assigiinngitsumik paasinnittariaaseqarneq Siumumiit tamaasa tusaavagut tamakkulu tunngavigalugit nalilersuisimavugut.

Siumumit oqimaaluttat annersaraat inuusuttut pineqartut sullinneqarnerisa pitsanngorsarniarlugu suliaqartoqassasoq, tamannalu Naalakkersuisut siunniussimammassuk tapersorsorparput.

Siumullu paasinnittariaasia naapertorlugu tamanna ima isumaqassanngilaq, maannamut suleqataasimasut immersueqataasimasullu peqataatinneqarnerat unissasoq. Neriunartumik eqaannerusumik aaqqissuussinikkut sulineq pisariillisarneqassaaq inuusuttut pineqartut siullertut



iluaqutigisassaanik. Siunissamilu ilisimasallit suliamullu uummateqarfiginnillutik suleqataasimasut nangittumik peqataanissaat Siumup pingaartippaa.

Taamak oqaaseqarluta Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliamut ingerlaqqissasoq innersuussutigaarput.

Dines Mikaelen
Siumut